

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Champhai District Jail chu SASCI Part IV sum hmanga sak that a nih dawn thu Home Minister Pu K. Sapdanga'n a sawi.
- Bharat Scouts & Guides chuan chawimawina an pek theih sang ber dawng turin Chief Minister Pu Lalduhoma an thlang.
- Zo Re-Unification Organisation (ZORO) buatsaih Zofate inrawnkhawmnaah Zofate insuihkhawmleh nan hmalak zel ni se, tia rel a ni.
- Prime Minister Narendra Modi-a'n vawiin chawhma dar 11 hian 'Mann Ki Baat' programme-ah ram chung leh ram pawn mipuite hnenah thu a sawi leh dawn.

<><><>

HOME MINISTER – CHAMPHAI DIST. JAIL

Champhai District Jail chu SASCI Part IV sum hmanga sak that a nih dawn thu Home Minister Pu K. Sapdanga'n a sawi.

Champhai District tlawha zin Home Minister hian nimin khan Champhai District Jail leh Zokhawthar Police Station leh Land & Custom building sak tharte a tlawh a; District Jail leh Zokhawthar Police Station a tlawhnaah hian thawktute nen inkawmin, thawktute hian an mamawhte Home Minister hnenah hian an lo thlen a ni.

Champhai District Jail hi mi 105 awm theihna a nih laiin tunah hian mipa 115 leh hmeichhia 14, an vaiin mi 165 an tang mek a; thawktu 20 an awm mek bawk.

Home Minister chuan, state chhunga Jail hrang hrangah Jail chhunga awm tur zat aia tam an awm deuh vek, a ti a. Mihring an pung chho zel angin sualnate pawh a pung ve zel bawk a, Jail-a lut an tam telh telh a, ram mihring cheng zat nena khaikhin chuan Mizoramah Jail tang an thahnem hle a, hei hi thil pawl tak a ni, a ti.

Home Minister chuan, mi thenkhat ten Jail atangin a tha zawnga thil zir chhuah an neih laiin thenkhat erawh chuan an Jail tânpuite hnen atangin thil tha lo thiam belhte an nei thin tih sawiin Jail-a thawkte pawhin tan an lak thar a tul hle a, mihring nun siamthatna hmun tak taka chhuah turin taima takin an enkawlte vil se, a ti a. Mi thahnemngai, pawn lam atanga Pathian thuhritu te, sorkar department dang dang ten Jail tangte hnena thiam thil an zirtir thinte chu a hlut zia hriain Jail tangte pawhin lo chhawr tangkai zel se a duh thu a sawi bawk.

<><><>

CHIEF MINISTER - BSG

Bharat Scouts & Guides (BSG) chuan chawimawina an pek theih sang ber dawng turin Chief Minister Pu Lalduhoma an thlang.

Bharat Scouts & Guides North East Mini Jamboree vawi 8-na nimina Chief Minister-in a hawna inkhawmah Chief National Commissioner, Dr. KK Khandelwal-a'n Chief Minister Pu Lalduhoma'n Mizoram Bharat Scouts & Guides te phur taka hma a lo lakpui thin avangin National Award sang ber Silver Elephant Award dawng tur hian an thlang tih a puang a; Chief Minister hi he Award dawng tura an rawtna DO letter a hlan nghal a ni. He award hi India President-in a hlan thin a, hun remchang hmasa berah Chief Minister hi hlan an tum a ni.

Bharat Scouts & Guides North East Mini Jamboree vawi 8-na hi Mizoram Bharat Scouts & Guides President, Chief Minister Pu Lalduhoma'n nimin khan a hawng a. Mini Jamboree hi Bharat Scouts & Guides Mizoram State Training Centre, Tanhril-ah nghah a ni. Hawna thu sawiin Chief Minister chuan tangruala hmalaknaah hlawhtlinna hmuh a ni thin, a ti a. BSG-in a tum ber pawh tangruala India tha zawk din a nih avangin he hun tawite chung hian thian tharte hlimna thlentu ni theuh turin kalkhawmte a chah a ni.

Mini Jamboree hian tun thla ni 28 thleng a awh dawn a. Hemi chung hian thil chi hrang hrang an zirin an tiho ang. Tun tum hi Mizoramin North East Mini Jamboree a thlen vawi hnihna a ni a. India hmarchhak bik tana ruahman a ni nain state dang atanga rawn kal pawh engemawzat an awm a, mi 300 vel an kal khawm a ni.



ZORO

Zo Re-Unification Organisation (ZORO) buatsaih Zofate inrawnkhawmnaah Zofate insuihkhawmleh nan hmalak zel ni se, tia rel a ni.

Zirtawpnia Aizawl MZP Conference Hall-a inrawnkhawmnaah hian kalkhawmte chuan resolution siamin, Chin-Kuki-Mizo chu thlahtu thuhmun, tawng khat hmang, nunphung thuhmun, serh leh sang inkhawih pawlh, beiseina thuhmun vuana dam leh tlang khatah, thih leh ruam khatah ti thin unau an ni a, unau an nih angin inthen thei an ni lo, an ti a.

India, Bangladesh leh Myanmar-a Zofa awmte insuihkhawmlehna tura ZORO hma lo lak tawhna leh United Nations Organisation (UNO) dawr lehna tur reng reng chu ZORO hminga thlen thin tawh ni se, an ti a. India, Bangladesh leh Burma ram hrang hranga thendarha awm Zofate insuihkhawm leh theihna turin UNO-ah Memorandum theh luh ni se, an ti bawk.

He inrawnkhawmnaah hian, Myanmar, Bangladesh, Manipur, Tripura, Assam leh Mizoram atangin palai an kal a. Zo hnam chi peng hrang hrang 27 atangin palai an tel bakah Myanmar Zofa MP leh MLA 7 an tel bawk a ni.

He huna thusawitu ZORO President Pu R. Sangkawia chuan, Zoram chu Zofate ta a ni a, zofate chenna tura Pathian pek a ni a, a neitu dik tak an ni, a ti a. Kum tam tak intlawhpawh tawn loh avangin unau inhriat loh chang pawh a awm a, thisen a inzawm tlat avangin chenna hrang mah se inunauna a bo thei chuang lo, a ti a. Zofate thendarhtuten India, Burma leh Bangladesh-ah te then darh mah se thlahtu thuhmun, nunphung thuhmun, serh leh sang inkhawihpawlh, thih leh ruam khatah ti thin unau dik tak an ni, a ti.



CHAMPHAI VLO TRAINING

Village Council Inthlan puala Roll ennawn tura inpuahchahna kal zelah nimin khan Village Level Officers (VLO) te pualin Champhai I&PR Auditorium, CHANEM-ah training buatsaih a ni.

VLO Training hi Champhai SDO (Sadar), Election Officer ni bawk Pu Ngulzaṭhuama'n a kaihruai a. Special Summary Revision neih turah hian January ni 1, 2025-a kum 18 tling chin, January ni 1, 2007 hmalama piang chinte tan inziahluh theih a nih thu a sawi a. Roll-a inziaklut thar tur te chu an inziahluhna tur khua emaw vengah emaw thla ruk tal an cheng tur a ni, a ti bawk.

He hunah hian District Level Master Trainer, Dr. Vanlalnunpuii Ralte, Asst. Electoral Registration Officer ni bawk chuan VLO te mawhphurhna hrang hrang a sawifiah a. VC Inthlan chu kumthar maiah neih tur a nih tawh avangin roll ennawnaah fimkhur a ngai hle a ni, a ti a. VLO te chu document leh form hrang hrang uluk taka ziaak lut turin a chah a ni.

Pi Kawlhmingliani, DEO, Election Branch, DC Office chuan Roll Revision kaihhnawih form pawimawh hrang hrang ziah luh dan a sawifiah a. Training-ah hian VLO 66 an tel a ni.



AIR ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.



LAWNGTLAI

Lawngtlai District Deputy Commissioner Office bul tuma 'Khua leh tuite Ngaihsak-Harsatna Chinfel Ni' thawh li-na chu Zirtawpni khan Sangau-a BDO Conference Hall-ah hman a ni a. Chawhnu dar 1 atanga tlai dar 4 thlengin sawrkar department hrang hrang te mipui dawr theihin an inpho chhuak a ni.

'Khua leh tuite Ngaihsak-Harsatna Chinfel Ni' puala hun hmannaah hian sawrkar Department 15-te chu mipuite dawr theih turin dawhkan hrang hrangah an inpho chhuak a. Tunhmaa he Ni hman tawhah mipuiten hlutin an ngai pawimawh thin hle tih kan corr chuan a sawi a, mi thahnem takin department hrang hrang inpho chhuakte hi dawrin harsatna an neih ang angte an thlen nghal thin a. Sangau-a hun hmanna pawh hi mipuiten hlutin an ngai pawimawh hle a; Lawngtlai kal kher ngai lova sawrkar official-ten an kal chilh chu thilung taka an lawmthu an sawi a; hlawk an tih thu pawh an sawi a ni.

DC hian nimin khan Sangau-IV lei tlahniam tlawhin, Disaster Management & Rehabilitation hnuai Mitigation hnathawh leh hmalak dan a enfiah a, Far Pâk Self Help Group te a kawm nghal bawk.



PM MANN KI BAAT

Prime Minister Narendra Modi-a'n vawiin chawhma dar 11 hian 'Mann Ki Baat' programme-ah ram chung leh ram pawn mipuite hnenah thu a sawi leh dawn a, Tun tum hi a tum 116-na tur a ni.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO leh Information and Broadcasting Ministry-a YouTube channel-ah live-stream a ni bawk ang.



DELHI AIR QUALITY

National capital Delhi-a boruak quality chu a chhe hle a, nimin dar 8 thleng khan Air Quality Index (AQI) ah chuan 398 a ni. Central Pollution Control Board-in a tarlan danin, khawpui chhung hmun thenkhat chuan AQI level 400 chu a pel hlawm a . Delhi-a Ashok Vihar chu 426 niin, Bawana chu 423 a ni a. Alipur-ah 425, Vivek Vihar chu 428, Bawana chu 412 leh Wazirpur-ah 440 a ni. India Meteorological Department (IMD) chuan Delhi leh NCR-ah ni hnih chhungin zan leh zing dar 12 chhungin boruak chhiat avanga chhum zing a awm a rinawm thu an sawi.

